

二七 袁世凱

一

袁世凱，字慰庭，河南項城縣人。光緒間入慶軍從征朝鮮，歸國後，訓練新建陸軍，戊戌變起，得西后信任，巡撫山東，庚子後，繼李鴻章爲北洋大臣，權勢益盛。辛亥光復，爲民國第一任大總統，五年叛國稱帝，以雲南起義，退位而死，故在滿清爲權臣，在民國爲罪人，此天下之公言也。

二

世凱爲中興名將袁甲三之猶子，幼承先蔭，以世家子弟入提督吳長慶幕，長慶慮其文理之不通，屬文案張季直爲教師。旋以辦事精幹，擢任營務處，迨慶軍退朝，而世凱仍留成爲商務總理，此其發跡之始。

朝鮮原爲中國之藩屬，日本素所覬覦者。及戰事起，清廷樞臣，分和戰兩派，直督李鴻章主和，翁同龢李鴻藻主戰。世凱方當前衝，迭電告急，鴻章勉以耐守，卒以面陳大計，奉准回國。既抵天津，因循而不回任。相傳鴻章一怒之下，撻以嘴巴。世凱因此陰結同龢、鴻藻，逕入北京矣。明年，中日戰爭結束，得鴻藻保荐，以督辦軍務，負責小站練兵，造成北洋軍閥二十年之勢力，流毒之烈，至今不泯。誰實爲之？

三

戊戌變起前，世凱與維新派，固有聯繫，及帝后齟齬，維新派以世凱幹練有爲，請德宗以恩結之，乃得召見，特賞侍郎。未幾，天津閱兵，政變將起，譚嗣同逕造袁邸，密請保皇上，清君側，以定大業。世凱佯允之，而陰盡報于榮祿，因此德宗被囚，六臣梟首，康梁亡命海外，西后又復臨朝。

世凱以賣友之功，巡撫山東，迨拳匪禍起，聯軍陷北京，兩宮西幸，世凱與劉

坤一、張之洞等，宣布保境安民，故華北混亂如麻，而山東安謐如常者，世凱之功也。

辛丑合約成，李鴻章以老病逝世，遺疏保荐世凱，有「環顧宇內人才，無出袁世凱之右者」語，從此，世凱遂得狼抗朝列，虎步京師，權傾一世矣。

四

宣統改元，攝政王載灃，擬誅世凱，以洩積憤，而張之洞以其軍權在握，誅之不利，於是放歸原籍。迨武昌起義，四海鼎沸，清廷束手無策，乃起用世凱，授以軍政，因得宏展權術，操縱大局，採「一箭雙鵰」之策，一面勸清帝遜位，一面以溫和手段，聯絡革命黨人。孫中山先生本「天下爲公」之精神，飄然下野，以圖收拾時局，世凱依法當選爲第一任大總統。

惟以約法限制總統職權太嚴，乃毀約法，進一步排除異己，暗殺宋教仁，激成二次革命，平定以後，野心益熾，終以總統爲民選，非子孫萬世之業，遂于民國五

年，廢民主，爲帝國，建號洪憲。而蔡松坡雲南起義，各省響應，世凱退位，憂憤而死，綜其一生，權術自用，軍事萬能，羈靡人才，則以高官厚祿，以爲治天下者，不過如是耳。庸詎知違反時代潮流，必至一敗塗地而後已。後之執政者，不引以爲鑑，反師其術，又無其才，抑更陋也。

(全書已完)